

# Jude Saadanii Kaarita

## Di'oraz kaarita daua'o

*Di'oraz kaarita Jude saadanii mishidainao Jesus Christ ati'o. Ukaki-naowan i'dyaun mariidinauzonao tiichaanao kakinaori ai, oo pana'iti'o itominapa-kidanii kida ai. Ukowaadan mishidainao ati, wuru'u mariidinauzonao tiichaanao, aonaa bauda'apa mani itominapa-kidan pana'iti'o parada-karu Jesus Christ dau'an, mazan itominapa-kidan naa pidannao mashaapa'o ni'i naa oii. Inao aia'o kapam Peter kakinaowanuz mishidainao itamautan pasaadanii ida'a.*

*Jude kowaadan kapam da'a'a pakaaritan ida'a na'apam nii Tominkaru pataka'utan na'iki umainaabatan tikazi idi wuru'u mariidinauzonaouz tiichaanao, na'apa umainaabatan kawan oiainao kotua'a naa, saadauzo-kariwaiz Tominkaru paradan kowaadan kawan.*

## Kaarita buutinpan kida

Sakadin-kinai . . . . .	1-2
Mariidinauzo tiichaanao dau'ana'o . . . . .	3-16
Mishi kizi ma'ozaka mishidapa-karu . . . . .	17-23
Tominkaru umanawunun konaukii-kida-ka'o . . . . .	24-25

**1** <sup>1</sup>Di'oraz kaarita o'garu Jude saadanii. Jesus Christ poitoru wuru'u o'garuz na'iki James inawuzu o'garu.

O'saadan di'oraz kaarita ipai pidannao ati'o, waDaru Tominkaru dapadaniinaouz, mashaapa'o nii pakamarainapanun ida'a, na'iki Jesus Christ taapaniinaouz kaiman.

<sup>2</sup>Marii powa'a zii kamunan-karu, kaiman-karu nyukunui ii,

na'iki kamarainpan-karu na'an unao ida'a.

### *Mariidapa'o patominapa-kidan pidannao*

<sup>3</sup>Omarainapanii o'min-mishidannao, tuukia'o da'i o'saada'azon o'kaaritan u'ati, tawuru dau'ana'a kazannaatin-karuz oia'o ai, baokopa'oraz wamishidapauzon. Mazan aizii o'saadan nii o'ma'ozakada-kinaa nii unao, ma'ozaka kizi

Jude

ukazannaatapan wuru'u umishidapanuz, mishi'o kuwai Tominkaru taaniaz naa papidannao ati. Kari-kaonanu'o nii una'an, aonaa turuu upana'ada-ka. <sup>4</sup>Ökian kaikapa'a, usha'apanum kau'an kaina'a oiainao pidannao zaamatanin ubii iti, aona'o ïaitapa-ka. Ìnao pana'ada'o kaimana'o kuwai Tominkaru kamunanun dau'oraz. Īpana'adan wuru'u parada-karuz kaimana'azoo ïsha'apaapan oia'o, kakiba'azonnaa kida'o, na'iki ipai aimakaan dikauda kida'o usha'apaapa-ka. Na'iki aona'a naa ïnyukunuuatin Jesus Christ, buda'apa'oraz na'iki umanawunu'oraz wanaobanaa. Mazan na'apainao pidannao pataka'uta-kinao ni'o dau'ana'o, tawuru'u saadauzo-kariwaiz kotua'anaa, Tominkaru paradan ida'a.

<sup>5</sup>Ökakuwaapa'azon u'ati uaitapan pu'a'a naa padamata kidaz, òaipan idi'o unyukunuitapan uruu wanaobanaa kazannaata'oraz papidanannao Israelitena'o Egypt iki. Mazan udauna'an, umainaabata ipai mamishida-kainao pidannao ïbii iki. <sup>6</sup>Na'iki unyukunuitapa, na'apam pabi'i kida angelnao, aonaa ïna'ian wuru di'ia'a Tominkaru taaniaz kaimana'o ïwiizi nii na'iki ïkaudinkiz nii, mazan ïmarina'atan kaimana'o pamashaapa-kizi. Ìnao kaina'a'a naa Tominkaru taapan maruta'o ka'azo ii chaintinapa, atii oiainao pataka'uta-ka kamoona kaawan di'iti. <sup>7</sup>Unyukunuitapa kizi

kapam, Sodom na'iki Gomorrah,<sup>a</sup> na'iki ïdazaba an kida'o wiizai, na'ii pidannao kiaapaakauzon madoronaa-daun, na'iki daonaioranao kiaapaakan pa'atiaaka kida. Uruu dikin ii Tominkaru mainaabatan wuru'u donoi pakawaodan ida'an kidaz. Aimaakan sha'apanuz kaikapa, ukainaabatan kaina'a'o tikazi karikaonanu'o una'an, pidannao sha'apaapainao oii kida'o pataka'uta-kizinao ni'o.

<sup>8</sup>Na'apa kida'o ida'an pidannao pataka'uan pananaa, zaamataninaouz unao bii iti, ïmishida na'apam pazanda'awun ia'o patukapan karikaonan. Uruu idi'o tuukii ïdikintapan Tominkaru paradan, na'iki ïparadan dikauda aokazi iainao umanawunuinao dau'an. <sup>9</sup>Upu'u zii angel Michael, umanawunu'oraz ba'orainao angelnao bii'i, aonaa na'apam ukian Satan ati, aonaa udakoopanuzu, ukadako-waakan dono utuma Moses nanaa dau'an. Mazan ukian Satan ati, "Önaobana'o nii pa'an kashadakowau pugaru."

<sup>10</sup>Aizii wuru'u pidannaouz, ïdakoapa zii pamaaitapanii aimakaan kida. Ìnao na'apa'o wuniinao maaitapinkan kawan, sha'apatina'oraz panyukunuu aipan kawana'ati karikaonan. Ukau'an ïsha'apatani oii kida'o aimakaan panyukunuu aipan kawana'ati, na'iki ïsha'apatani kidaz, uru'o nii wuru'u pataka'uta-kida'o ni'oraz

<sup>a</sup> 1:7 *Sodom na'iki Gomorrah*: Putukapa kaarita tokon ii Parada-karu Masha'apan-naada-kinao di'ii.

ĩdyaun. <sup>11</sup>Kasha'ora'o nii manawun ĩbaianpan! ĩda'anan idi Cain kaduz, Cain zowiauzoz pa'inawuzu. <sup>b</sup>Na'apa ĩnao Balaam kawan, tuukii manawun ĩaipan puraata, uruu idi ĩsha'apatan pana'iti'o aimaakan. <sup>c</sup>Na'iki Korah kawanu'o ĩkashadamikin, na'apa'o nii uruu kawan ĩmainaabata-ka'o pakashadamikin idi. <sup>d</sup>

<sup>12</sup>Aizii ubaokopainpauzon dono uaroapa-kizi ii, kakiba'azonna'o nii ĩarooapan dono utuma, ĩtuzapan na'iki mabaa'azoo ĩsha'apatan oii kida'o ubii ii. ĩnao ĩaipan aimaakan soo pa'ati karikaonan. ĩnao na'apa'o wunu wa'atin kawanu'o maruta'oraz utomina'akan, mazan aonaa ukaawan uzabia'azon amazada aradan, mazan sawata'aka'oraz udobatapan isha'iz nii awaru mainaabata'akan idiz. ĩnao na'apa'o dizoo-karu kadunaa kida kawan makaaka-ka'oraz, ba'oran dizoo-karu kadunaa kida kaakapaan dono. Mawaka'o manawun rokoda-kariwai pa'ishitaba'u tuma kawanu'o ĩdyaun. <sup>13</sup>Ĩnao na'apa paran ia'o wunu kaparanun kichana'iki-kian kawan, ĩbozoodapan kaniriba'o kakiba'azonnaa kida'o pasha'apaapanii. ĩnao na'apa zikainpa'o wizinao kawan, aona'oraz turuu pidan aitapan pakainaabatan na'itim pamakon ĩ'ida'an. Uruu idi kaina'a'a naa ĩwiizi nii taapa-ka'o, uruu maruta'oraz manawun, na'iki karikaonanu'o nii ĩna'ian.

<sup>14</sup>Kotua'a naa Enoch kowaa-dan aimaakan sha'apa'o nii dau'u ĩdau'an. Wuru'u Enoch, 7 udokozudaunnao Adam di'iki'o. Uruu Enoch kiauzoz:

“Utukapa! Naobanai wa'atin iriba'o pa'angelinnao tuma.

<sup>15</sup>Uwa'atin uwidaua'anan naa ipai pidannao.

Upataka'uta'anan ipai pidannao dikintapainauz Tominkaru, ĩmashaapan idi oii, na'iki ĩdakoopan idi Tominkaru dikauda'o ida'an.”

<sup>16</sup>Ĩnao pidannao, ĩnaudapa paparada-paradaapan panyukunu oian idi, na'iki ĩparadan oii ba'orainao dau'an. ĩmashaapan naa panyukunu aipan kawana'ati'i naa, oipa'a naa. ĩnao pidannao, umana-wun nii ĩkakuwaapan padau'an. ĩparadan konaunam, ĩkaimandakoinpan pidannao ati, ĩaipan idi pa'ati'i karikaonan kaiman-karu.

*Jude kakinaowan pasaada-kizinao pakaaritan*

<sup>17</sup>Ōmarainapaniinao! Aonaa umanyukunuuta'ana'a wanaobanaa Jesus Christ apostlennao kowaadauzonii, diina'iti'o nii usha'apanu'u. <sup>18</sup>Īkian unao ati, “Diina'iti'i amazada katokon-tina'anan di'iti, kaina'a'o nii pidannao dakoopa'o nii Tominkaru na'iki upidanannao. ĩnao pidannao, sha'a-

Jude

<sup>b</sup> 1:11 Genesis 4:3-8   <sup>c</sup> 1:11 Numbers 22:1-35   <sup>d</sup> 1:11 Numbers 16:1-35

paapa'o oia'o panyukunuu na'akan kawana'ati paugaru.” <sup>19</sup>Na'apa'o pidannao toma'oraz buutaaka-karu unao bii'i. Īsha'apaapan aimakaan panyukunuu na'akan kawana'ati'o paugaru karikaonan, na'iki aonaa Tominkaru Doronaa nii ĩ'ida'a.

<sup>20</sup>Mazan unao ōmarainapaniinao, marii karikaonan umashaapan uma'ozakadaaka, powa'a zii uma'ozakada umishidapan kakinaorii kida, Tominkaru di'iki'oraz. Utoriinpauzo Kaimana'o Doronaa kaminka'utan ida'an unao. <sup>21</sup>Umashaapa'anaa Tominkaru kamarainapanun ida'a, uzadapatinan pu'a'anaa wanaobanaa Jesus Christ kamunanu'unan, pataan ida'an u'ati karikaonanu'o kakupakaru. <sup>22</sup>Ukamunan-kida na'iki uma'ozakada umin-mishidannao, aona'oraz naa ĩaitapanaatan na'ia'oram pamishida. <sup>23</sup>Na'iki ukazannaata kapam ba'orainao,

ukazatan ida'an ĩdyaun ĩna'aka-kaoa tikazi di'iti. Na'iki ba'orainao, ukamunan-kida ĩdyaun, mazan uzaudin ĩkaduz ai, aonaa kizi ukaiwadan ĩkamichan kaduz, kaniriba'oraz naa ĩ'oiian idi.

*Jude konaukii-kidan Tominkaru  
umanawunun*

<sup>24</sup>Uruu Tominkaru ka'iita'oraz pataapan unao uwaotan ai oia'o di'iti, na'iki uruu kadishita-kida'o ni'oraz unao kaimana'o pidannao nii, na'iki konaukiainao nii, umanawunu'o pakonaunaman kanaapu ati. <sup>25</sup>Wakonaukii-kida uruu, soo uruu bauda'apamishi'o Tominkaru, uruu wazananaa, waNaobanaa Jesus Christ ida'an. Soo bauda'apauruu ida'a konaunama-karu, umanawun-karu, ma'ozaka-karu, na'iki udaru'o naobanai-tinapa-karu, kotua'a naa amazada sakadinan iki, kai, na'iki karikaonan. Amen.